



А К А Ф И С Т

ПРЕСВЯТОЙ БОГОРОДИЦЕ

Явления ради чудотворныя Ея иконы

КАЗАНСКІЯ.

А К А Ф И С Т

ПРЕСВЯТЕЙ БОГОРОДИЦЕ

явления ради чудотворныя Ея иконы
КАЗАНСКІЯ.

Кондак 1-й.

Избранней от всех родов заступнице рода хри-
стианскаго, покровем Своея благодати покрывающей
страну нашу православную, благодарственная пе-
ния приносим Ти, Богородице, о явлении чудныя
Твоея иконы. Ты же, яко всемилостивая всех при-
текающих к Тебе, помощнице, заступай нас во всех
скорбех и нуждах, бедах и напастех, да зовем Ти:
Радуйся, заступнице усердная рода христианс-
каго!

Икос 1-й.

Ангел предстатель послан бысть рещи Богого-
дице: Радуйся, егда Бог Слово воплощашеся во
утробе Ея; и мы, грешнии, прославляюще явление
чудныя Ея иконы и Божественнаго Младенца Спа-
са Христа, со умилением вопием Благодатней:

Радуйся, Богоизбранная Отроковице;

Радуйся, Мати Божия.

Радуйся, Царице небесе и земли;

Радуйся, светлое Церкви небесныя и земныя
украшение.

Радуйся, Ангелы чтима;

Радуйся, певаемая от Серафим.

Радуйся, светлое пророческое сбытие;

Радуйся, Апостолов похвало.

Радуйся, мученическое исповедание,

Радуйся, праведных венче.

Радуйся, преподобных веселие;

Радуйся, грешных уювание.

Радуйся, заступнице усердная рода христианс-
каго!

Кондак 2-й.

Видящи, Всенепорочная, с высоты небеснаго жилища Своего, иде же с Сыном Твоим в славе пребываеши, скорбь рабов Твоих в новопросвещенном граде, яко гневнаго ради Божия посещения вера Христова поругаема бывает агарянским зловерием, благоволила еси явити икону Свою, чудеса ю прославляющи, да утверждаеми знаменіями Твоея благодати, христоролюбивии люде верно вопиют Богу: Аллилуия.

Икос 2-й.

Разум трикратнаго явления Богоматере мудрая отроковица разумети ищущи, тече ко властем, поведаящи им дивное явление и грозное прещение; мы же, дивящесе свыше данному отроковице вразумлению, благоговейно вопием к Препоблагословенней:

Радуйся, устнами детей хвалу Богови совершающая;

Радуйся, тайны благодати Божия, юным открывающая.

Радуйся, неверных сумнительное слышание;

Радуйся, верных известная похвало.

Радуйся, молние, неверных устрашающая;

Радуйся, славою чудес Твоих верных смыслы озаряющая.

Радуйся, агарянскаго зловерия обличение;

Радуйся, веры христианския утверждение.

Радуйся, почитания святых икон освящение.

Радуйся, скорбь нашу в радость претворяющая;

Радуйся, несумненною надеждою нас увеселяющая.

Радуйся, заступнице усердная рода христианскаго!

Кондак 3-й.

Сила Вышняго благодатию Богоматере умудри и укрепи отроковицу к исканию многоценнаго Божия дара, и та с верою дерзающи о Господе, приступи к труду, и скрытое в земли обретши сокровище святых икон Богоматерни, радостно возопи к Богу: Аллилуия.

Икос 3-й.

Имеючи благоутробное промышление о новопросвещенных людех града Мазани, от пречистия Твоея иконы токи чудеса источила еси, Владычице, слепым телесными очима зрение подавающи, омраченных же душевно светом Богопознания и благочестия озариюди, девствующим под осенением Твоея иконы пристанище небурное даруши. Сего ради зовем Ти:

Радуйся, явлением иконы Твоея тьму лютых обстояний отгоняющая;

Радуйся, лучами чудес всех просвещающая.

Радуйся, слепых прозрение;

Радуйся, омраченных смыслом просвещение.

Радуйся, славо православия;

Радуйся, тихое пристанище ищущих спасения.

Радуйся, Мати целомудрия;

Радуйся, покрове и ограждение девства.

Радуйся, Ею же ликовствует все множество верных;

Радуйся, Ея же ради рыдает демонское полчище.

Радуйся, всех христиан возделенная помощнице;

Радуйся, всех скорбящих радости.

Радуйся, заступнице усердная рода христианскаго!

Кондак 4-й.

Бурю смятений и крамолы врагами, воздвигнутую в стране нашей утолити тщаься блаженный Гермоген, списатель чудес Твоея, Богомати, иконы, слезно пред нею молящися, и видев, яко воинству православному в щит и победное знамение Твоя икона даровася, верою укрепляемый до конца живота своего вопияше Богу: Аллилуиа.

Икос 4-й

Слышавше православнии воини откровенную преподобным Сергием святителем Арсением тайну, яко предстательством Богоматере суд об отечестве нашем преложен на милость, икону Богоматерию, яко знамя победное примите, исхитиша, мать градов русских из рук супостат и воззвисти заступнице христиан:

Радуйся, Мати Бога Вышняго;

Радуйся, яко за всех молиши Сына Твоего Христа Бога нашего.

Радуйся, яко всем твориши спастися, в державный Твой покров прибегающим;

Радуйся, заступнице всех, сущих в скорбех и болезнях.

Радуйся, всем молящимся сокрушенным сердцем пред пречистым Твоим образом, полезная дарующая;

Радуйся, избавление зол всем, невозвратно надежду имущим на Тя.

Радуйся, тихое и доброе пристанище;

Радуйся, скорая помощнице.

Радуйся, готовый и теплый покрове спасения;

Радуйся, источающая нам неоскудную милости.

Радуйся, предваряющая на помощь;

Радуйся, избавляющая от всех бед.

Радуйся, заступнице усердная рода христианскаго!

Кондак 5-й.

Боготечная звезда явися Твоя, Богомати, икона, всю страну Российскую обтекающая, лучами чудес Твоих осиявающая всех, блуждающих по морю естрастнаго жития, мрак печалей и мглу всяких недуг и скорбей прогоняющая и наставляющая на путь спасения, с верою к Тебе прибегающих и вопиющих Богу: Аллилуия.

Икос 5-й.

Видев царь Петр, яко от святых икон Богоматери благодатию Божиею содеваются многая чудеса, приемлет ю в путеводительницу воинству своему и в день брани на свеев в щит и покров, и победив до конца врага, помощию Богоматере, тем камень совершенный во основание новаго града положи, икону же Твою чудную, яко освящение, яко щит и ограждение, в сердце града постави. Сего ради вопием Пречистей:

Радуйся, жилище и доме Христа Бога нашего;

Радуйся, вместилище неизреченныя Его славы.

Радуйся, граде одушевленный, присно царствующий;

Радуйся, палато преукрашенная.

Радуйся, радости градов и весей;

Радуйся, непобедимое христиан в бедах хранилище, и предградие.

Радуйся, Церкви Православныя похвало;

Радуйся, христолюбиваго воинства помощнице.
Радуйся врагов одоление.
Радуйся, от всех бед избавление;
Радуйся, Матерними Твоими щедротами всех по-
сещающая.
Радуйся, заступнице усердная рода христианс-
каго!

Кондак 6-й.

Предстояще пред пречистым Твоим образом архи-
ереев сословие и вси людѣе, монаси и мирстии,
проповедуют, Госпожѣ Богородительнице, великия
Твоя милости, яко грады ограждаеши, обители по-
крываеши, веси защищаеши, и вѣдуще Тя воистину
помощницу сильну и непобѣдиму, со слезами при-
носят Ти молитвы, да прострещи к Сыну Твоему
Богоносныя руки за люди Твоя, еже избавити нас
от всех бед и напастей, да благодарне вопием
Богу: Аллилуия.

Икос: 6-й.

Воссиявши просвещение истинное и отгнавши
лесть агарянскую во новопросвещенней стране
и в новом граде, светиши светом чудес и мило-
стей: притекающимъ бѣ с верою ко Твоей иконе
цельбоносней, и скорбей избавление, и недугов
и целение и радости всякия исполнение прием-
лют, вопиюще Тебе усердно:

Радуйся, неистощимый источнице святыхи;
Радуйся, многотекущая реко Божественныхъ бла-
годати.
Радуйся, грешныхъ с Богом примирение;
Радуйся, грехов нашихъ очищение.
Радуйся, благочестия наставнице;
Радуйся, в добрыхъ делахъ утверждение и помо-
ще.
Радуйся, добрыхъ обеты приемлющая;
Радуйся, благимъ намерениемъ способствующая.
Радуйся, злыхъ начинания разрушающая;
Радуйся, вражия козни расторгающая.
Радуйся, скорая человекомъ помощнице;
Радуйся, милость намъ сугубо подающая.
Радуйся, заступнице усердная рода христиан-
скаго!

Кондак 7-й.

Хотящим людям исповедати милости преблагословенныя Царицы небесе и земли и по силе благодарственная принести о избавлении Отечества нашего от нашествия иноплемennых, дивному храму, созданному в честь пречудныя Иконы, победная в дар принесоша, да вси памятующе милость Богоматере, спасшия град и Отечество наше, ныне воспевают Богу благодарными усты: Аллилуия.

Икос 7-й.

Новому граду святая икона Твоя, Богомати, воистину явися благая одигитрия, яко же древле в Цареграде: к Тебе бо прибегают вси ^{помощи} Твоя на начало пути и дел своих просяще и благодарственная приносяще моления пред пречистою иконою Твоею за избавление от скорбей и напастей, Тебе, помощницу и заступницу крепкую ведуще. Тем же благодарственно вопием Ти:

Радуйся, Российския страны покрове;

Радуйся, православия в ней ограждение и утверждение.

Радуйся, несокрушимый щите градов и весей наших

Радуйся, броне их неуязвимая.

Радуйся, козни врагов обличающая;

Радуйся, яко паутину их растерзающая.

Радуйся, нечестия обличение;

Радуйся, крамолы разрушение.

Радуйся, юных от заблуждений исправление,

Радуйся, старцев утешение.

Радуйся, душевредных учений низложение;

Радуйся, душеполезных знаний дарование.

Радуйся, заступнице усердная рода христианскаго!

Кондак 8-й.

Странно и сумнительно неверующим слышати, како от иконы Твоея токи благодати истекают, воия животная благоухает; мы же, верующе слову, реченному Тобою, Владычице, к первоначисанней иконе: — "С тобою Моя благодать и сила", уповаем, яко и с сею иконою благодать Твоя выну; тем же бла-

гоговейно предстояще лобызаем ю, покланяемся ей, яко Тебе Самей сущей, честь бо иконы на первообразное восходит, и Твоя благодать сею иконою знамения и чудеса содевает всем, с верою притекающим к Тебе и вопиющим Богу: Аллилуия.

Икос 8-й.

Вся бывши горе, к небесным взята, и земных не оставляши, Богомати, священным Твоим представельством: имаши бо Матернее дерзновение ко Христу Богу нашему. Темже утверди в мире глубоче православных житие, и вся полезная всегда даруй рабом Твоим, да величающе воспеваем Ти: Радуйся Невместимаго вместилище;

Радуйся, Носило всего Божества.

Радуйся, прѣзвѣшшая клас небесный;

Радуйся, мир весь душепагубнаго глада избавляшая.

Радуйся, выну ходатайствующая за род наш;

Радуйся, яко много может молитва Твоя пред Сыном Твоим и Богом.

Радуйся, всех нас при кресте Сына Твоего усыновившая;

Радуйся, всегда Матернюю любовь к нам являющая.

Радуйся, ходатаице вечных благ;

Радуйся, и во временней жизни полезная нам, подающая.

Радуйся, известная прибежище наше во всех скорбных обстояниях;

Радуйся, несомненное утешение в печалей.

Радуйся, заступнице усердная рода христианскаго!

Кондак 9-й.

Всякаго естества ангельскаго превысшая явилася еси, Пресвятая Дево: Бога бо зачала еси плотию, Невместимаго всеми вместила еси во утробе Твоей, на руках носила еси Носящаго весь мир дланию: темже, яко честнейшую Херувим и славнейшую без сраждения Серафим величающе Тя, вопием о Тебе Богу: Аллилуия.

Икос 9-й.

Ветия многовещанная, яко рыбы безгласныя видим о Тебе, Богородице: недоумет бо всяк язык благохвалити Тя по достоинию, изумевает же ум и прѣмирный пети Тя, Богородице: обаче благая сущи, прими и от нас архангельский глас Тебе вопиющих: Радуйся благодатная;

Радуйся, яко Господь с Тобою.

Радуйся, благословенная в женах;

Радуйся, обретшая благодать у Бога.

Радуйся, родившая Спасителя миру;

Радуйся, Мати Сына Божия.

Радуйся, родительнице вечнаго Царя;

Радуйся, израстившая нам плод живота.

Радуйся, освященная Духом Святым;

Радуйся, осененная силою Всевышняго.

Радуйся, верная рабо Господня;

Радуйся, яко Тя блажат вси роди.

Радуйся, заступнице усердная рода христианскаго!

Кондак 10-й.

Спасти хотящи многия от находящих зол, скорбей и болезней, чудную икону Твою, Богомати, даровала еси, ея же ради слепии прозирают, хромии ходят, разслабленнии возстают, беснующиися исцеляются, земли плодоносие подается, люди от смертоносных язв избавляются, грады и домы от огня спасаются: темже прославляюще Бога, дающаго нам таковыя милости, вопием Ему усердно: Аллилуия.

Икос 10-й.

Отена еси, Богородице, Российской стране, градом ограждение и слава, воинству на враги укрепление. Тем же, благодарнице Тя вопием:

Радуйся, прославляющих Тя прославляющая;

Радуйся, нечтущих Тя посрамляющая.

Радуйся, врагов устрашение;

Радуйся, от нашествия иноплемених избавление.

Радуйся, православных христиан славо;

Радуйся, воинов крепосте.

Радуйся, в дни брани забрало и ограждение;

Радуйся, в дни мира живоносный саде, *Увеселяющии сердца*

Радуйся, оружие, его же трепещут демони;

Верныи.

Радуйся, спасительный елей, умащяющий грехо-
ныя раны кающихся.

Радуйся, теплое наше упование;

Радуйся, несомненная наша надежда.

Радуйся, заступнице усердная рода христианска-
го!

Кондак 11-й.

Пение хвалебное и благодарственное приносят
Тебе, Владычице, припадающе ко иконе Твоей и лю-
безно лобызающе ю, дев лицы, под державным по-
кровом Твоим тихое и мирное иноческое житие
провождаящи, и возложивше на Тя все упование,
радостно вопиют Богу: Аллилуия.

Икос 11-й.

Яко светоприемную свещу, зрим Твою честную
икону, Пресвятая Владычице: та бо невещественный
огнь благодати Твоея восприемши, и в подобиих
ей новы возжигает светильники, причастны тояжде
силы благодатныя, и озаряет чудеса, наставляющи
на путь спасения всех, вопиющих Ти сице:

Радуйся, невесто неневестная;

Радуйся, Богоизбранная отроковице, Мати Дево.

Радуйся, добрая наставнице непорочнаго девст-
ва; Радуйся, хранительнице ревнующих о чистоте.

Радуйся, жен похвало;

Радуйся, дев величание.

Радуйся, вдов заступление;

Радуйся, сирот призрение.

Радуйся, нищих питательнице;

Радуйся, нагих одеяние.

Радуйся, печальных утешение;

Радуйся, скорбящих веселие.

Радуйся, заступнице усердная рода христианска-
го!

Кондак 12-й.

Благодать дати восхотевши почитающим Тя с лю-
бовию, Богородительнице, присущую Ти силу благо-
датную оставила еси во святых Твоих иконах:

ибо Божественная благодать, спребывающи тем ико-
нам, знамения и чудеса выну содевает и душевных
и телесных недуг исцеление всем, с верою прихо-

дящим подает Твоими Богоматериними непрестанными к Богу молитвами о вопиющих Ему: Аллилуия.

Икос 12-й.

Поюще Твоя чудеса, бывшая в древняя и настоящая времена, хвалим Тя, яко живоносный источник благодати, яко неистошимую реку чудес, яко бездну милости и щедрот, и все упование по Бозе возлагающе на Тя и в сей и в будущей жизни, прославляюще Тя вопием:

Радуйся, христиан непостыдное упование;
Радуйся, верных спасительное прибежище.
Радуйся, ненадежных надеяние;
Радуйся, отчаянных спасение.
Радуйся, бане, омывающая совесть;
Радуйся, росе, оживляющая души.
Радуйся, болезней врачевство скорое и безмездное;
Радуйся, от всех бед быстрое избавление.
Радуйся, утешительнице во всякой скорби;
Радуйся, из глубины погибели спасающая.
Радуйся, отрадо в день смерти;
Радуйся, единая надежда и по смерти.
Радуйся, заступнице усердная рода христианского!

Кондак 13-й.

О, Всенетая Мати, рождающая всех святых Святейшее Слово, прими ныне малое сие моление, и величия ради благодати Твоея и бездны щедрот Твоих, не помяни множества грехов наших, но исполни во благих прошения наша, подавающи телу здравие, души спасение, избавляющи от всякия нужды и печали, и Царствия Небеснаго наследники сотворяющи всех, верно вопиющих Богу. Аллилуия.

М О Л И Т В А.

О, Пресвятая Госпоже Владычице Богородице! со страхом, верою и любовию припадающе пред честною иконою Твоею, молим Тя: не отзрати лица Твоего от прибегающих к Тебе, умоли, милосердая Мати, Сына Твоего и Бога нашего Господа Иисуса Христа, да сохранит мирну страну нашу, да утвердит Церковь Свою Святую и непозыблему соблю-

дет от неверия, ересей и раскола. Не имамы бо
и́ныя помощи, не имамы иныя надежды, разве Тебе,
Пречистая Дево; Ты еси Всесильная христиан
помощница и заступница. Избави всех, с верою
Тебе молящихся, от падений греховных, от навета
злых чело́век, от всяких и́скушений, скорбей, бед
и от напрасныя смерти; даруй нам дух сокруше-
ния, смирение сердца, чистоту помышлений, ис-
правление греховныя жизни и оставление пре-
грешений, да вси, благодарне воспевающе вели-
чия Твоя, сподобимся Небеснаго Царствия и тамо
со всеми святыми прославим пречестное и вели-
колепое имя Отца и Сына и Святаго Духа. Аминь.
